

摘藻堂四庫全書薈要

集部

欽定四庫全書薈要

集部

明詩綜卷五十三

四

詳校官編修臣汪鏞



欽定四庫全書薈要卷二萬五百二十六

集部

明詩綜卷五十三

翰林院檢討朱彝尊編

獻忠

一首

獻忠字伯臣松江華亭人嘉靖乙酉舉人知奉化縣及卒友人私謚曰貞憲先生有長谷集

靜志居詩話長谷以作者自期持論謂詩人之作代出意匠以增前人之能旨哉言也其比六朝聲偶品唐詩原樂府皆有功後學惜其書不盛行詩亦冲澹無累句特少警拔耳

俞氏水樓

故人江樓月照見千里心遊子未言歸清光被滿襟西  
陵隱簷際南湖澄夕陰持杯向木末捲幔對遙岑悵然  
不能去徒令江水深

沈爚一首

爚字世明一字伯遠嘉善人嘉靖乙酉舉人有  
石聯遺藁

送顧梧石之衡州

瀟江路轉千峰碧冉冉蒼雲拂樹低此去臨風憶回首  
月明江上鷓鴣啼

顧聞

二首

聞字行之吳縣人嘉靖戊子舉人自號九峻山人  
岳東伯云九峻才華瑋麗鋪敘豐長究其所  
歸靡不有自至於染翰人稱其能並美者矣

折楊柳

芳草接金隄垂楊綠更齊夕絮離天遠春絲別霧迷曲  
中青鏡改愁畔紫騮嘶紅樓歎少婦腸斷玉關西

夜泊崔鎮聞笛

雲落清河夜天橫片月涼江樓莫吹笛明日是山陽

孫宜十首

宜字仲可華容人嘉靖戊子舉人有洞庭漁人

集

顧玄言云漁人新聲奇調在李唐二孟之間河嶽隱淪之覓秀者

詩話洞庭漁人胡氏詩數稱其學杜然實源於大李故論詩絕句云我愛風流太白豪萬言珠玉在揮毫特其運筆癡重斯與謫仙人不類耳其於空同大復少谷太初迪功西原皆其所取法滔滔莽莽下筆不休亦楚產之傑出者

十三夜月

良晤既匪易佳節亦復過今夕非昨夕光景忽已多霏  
霏失玄霧黯黯增金波昔眄猶室隅茲升眇庭柯當扉  
萬象啓側戶三星羅蕭爽候愈寂沈冥夜如何興言悅  
至賞眷此成清歌

十四夜月

循環適常度盈昃亦至理幾望已在茲持盈有深旨天  
運恒自然人事安足恃未滿溢漸形欲盛衰伊始倚伏

本貞機損益妙良軌志以道自虛情緣欲斯侈守義焉  
所窮法乾信云美

送周氏

黃河逾東逝白日淹西沈人生不滿百奈此世慮侵貧  
賤豈得渝富貴安可欽浮榮竟杳漠要路恒崎嶇邵侯  
悅瓜田陶令謝華簪達觀信有及古道良足箴得喪匪  
人為憂樂由我心願言返初服聆我山水音

茭港



結軫倦久疴嚴裝理前遊山行稍云疲水宿良所由弭  
櫂臨別浦揚舲逝安流波迴路曲折雲霽天沈浮霜荻  
響近渚風篠鳴長洲沙翔去來鷺岸竝連拳鷗澤蘭晚  
漸垂江茝秋始柔遵嶼乍離合凌飈屢優游擊楫情已  
乖乘桴興將侔即此締暹盟抽詞贈同舟

行視別業禾稼作

徇祿返塵軌卧疴遂幽垞為圃竟不習學稼鮮所明薄  
田委僮僕嬾性謝經營春陽始云改夏序亦以征輟翰

越城樓振衣事郊行既暢景物麗復感禾黍盈雲葉被  
畛秀風花覆阡平修渠濯細流佳實播初馨堅好類周  
穡耗蠹殊魯螟利婦足遺穗築場喜新晴澤忝我私及  
秋荷今歲成麤糲甘自嘗飽煖奚更營且免洛陽歎聊  
結杜曲盟

王生入山謝事戲簡

疾風吹雲暗江縣東城之雷北城電城中一雨絕可憐  
十日不見王生面昨當折簡傳深意咫尺山城爾須至

揚雄草玄亦避人  
侯芭載酒曾多事

秋日歌 二首

秋風忽吹洞庭草  
萬壑千崖覺秋早  
江邊白石迴波濤  
湖上蒼雲亂昏曉  
少年日月易搖落  
即目繁華已枯槁  
人事天時合併催  
風塵何必長安道

秋風浙浙吹茅屋  
東流之水西日速  
地連南極北極雲  
葉落千山萬山木  
江上漁人罷釣歸  
臨風拋擲綠荷衣  
黃塵碧海真漂泊  
白石滄波誰是非

同諸友遊郭曲

地勝因湖得堂幽對野開晚風吹笛起秋水抱城迴溪  
友留魚去鄰翁送酒來為言九日近引客試登臺

十三夜月東謝子

今夕江樓月能添昨夜明苑雲寒自斂城角霽尤清露  
警花間鶴風微樹杪螢百壺高興在端坐待君傾

陳津

五首

津字道通長洲人嘉靖戊子舉人仕至兵部職

方郎中有莪齋集

詠史

貧賤希富貴富貴履危機赫赫丹徒子當樞思布衣五  
鼎有覆餗一瓢堪樂飢可知東門犬不若西山薇火烈  
飛蛾焦泉深鯉魚肥胡為即顛越而不鑒於微不見成  
連子千載揚音徽

怨詞

明妃絕世姿少長君王側一忤丹青人咫尺成離隔何

况窮居士欲望君王識

石山驛

四野動力作荷鉏紛出村開塍望新沃喜見前山昏嵐  
氣藹林杪春風搖草根丘中有來信燕子入衡門

螢

分將光自照肯擬暗中投寂歷依書幌分明點客舟露  
涼深映竹風定直衝樓不恨飄零晚終隨大火流

陸冰修云

五六  
清警

燕子磯

燕子何年集釣磯  
春風不見舊烏衣  
空餘芳草迷前浦  
長自寒潮送落暉  
刺眼野桃臨岸發  
多情山鳥傍人飛  
獨慙白髮紅塵客  
此日披襟對翠微

鄧遷

一首

遷閩縣人嘉靖戊子舉人官嘉興通判

感秋

白露下亭皋  
涼風吹綺陌  
一夕芙蓉花  
紅芳變瑤碧

包

桐一首

桐字子同號同谷鄆縣人嘉靖戊子舉人官知縣  
送屠秋官國望復任留都

寒江渺渺煙霞開揚舲西指鳳凰臺大夫十年不得調  
風塵千里胡為哉銜杯欲別別最苦拔劍當歌歌莫哀  
壁水貫城當咫尺相逢還許坐莓苔

黃省曾 一首

省曾字勉之吳縣人嘉靖辛卯舉人有五岳山



人集

皇甫子循云勉之思劇沈幽語罕仍襲宿構非工食時為敏徐紹卿云勉之才藻

富捷篤尚深華

徐子元云勉之詩宗六朝如

空江月明獨鶴夜警

王元美云黃勉之如假

山池雖爾華整大費人力

穆敬甫云山人從

空同遊刻意為詩遂成一家

岳東伯云五岳

遊覽之餘操觚靡倦剪剔綺繡

咀嚼瓊英每篇輟筆粲然驚目

詩話勉之詩品太庸沙礫盈前無金可揀當時

從遊李何漫無師資之益反不若方山汾溪二

賈人子尚有

秀句可采也

## 江南曲

旖旎綠楊樓儂傍秦淮住朝朝見潮生暮暮見潮去

史元中一首

卷五十三

元中號鹿泉鄆縣人嘉靖辛卯舉人魚臺知縣

有青蓮集

詩話鹿泉知魚臺縣事值歲大祲盜賊起有簡  
瑞者為盜魁善運稍馳馬出沒官道鹿泉以計  
縛之簡卧庭下瞠目曰吾左手持稍右短兵橫  
行千里間今為書生掩取天也公笑曰汝輕書  
生耶即起著短衣持其所用稍運之左右迴旋  
如舞匹練忽稍斷為三擲示簡曰汝稍豈足用  
耶簡叩頭稱死罪乃繫之獄至冬月將論決簡  
求見公曰身亦山東男子不敢負公乞假十日  
一生別老母公即縱之去衆皆懼及期先一日  
簡就獄離魚臺三十里為獨山大盜劉儀久嘯

聚其中有衆數千開府曾公詵議進勦以公為  
前鋒既擇日陳兵禡祭畢公知獨山有謀者在  
軍乃命植一竿百步外公手挾矢誓曰某以書  
生任將兵若一舉滅賊當三矢中此竿時萬目  
齊注監司諸將俱色變公從容三發三中呼譟  
震地是日公即察得謀者三人釋其縛賜以美  
酒食笑謂曰汝來觀吾射耶譟者股栗盡吐賊  
虛實及所入獨山徑道公立提兵襲其寨擒劉  
儀還曾公大喜方論薦公會曾公遷制三邊尋  
為相嵩所害赴市鹿泉歎曰事尚可為耶即日  
挂冠歸里時年四十二家居復四十年守令  
思一造見不可得老益貧惟賣文以自給云

## 秋思

世事吟邊改流光醉裏過歲收頻下下公賦益多多有

暇窮漁獵無憂隱薜蘿康衢終見及擊壤續堯歌

林垠一首

垠字天宇閩縣人嘉靖辛卯舉人選授桂陽知州遷撫州同知終戶部員外郎有野橋集

拒馬河作

拒馬河邊驛路長蜚狐口外又斜陽春光已過六十日  
不見花枝空斷腸

唐鉞一首

鉞字君錫蘭溪人嘉靖辛卯舉人任揚州府同知陞楚府左長史

江行

客計方歸越征橈更背吳風螢臨水亂江月向人孤洲  
已過迷子山行及望夫可憐清夜色強半在長途

黃中

三首

中字文卿處州人

蘭臺法鑒錄作遂安人浙士登科考同

嘉靖辛

卯舉人授鉛山知縣擢貴州道御史出為山東

按察副使有南窗紀竊集

田叔禾云括蒼詩派倡自郁離子自郁離

子歿作者無聞嘉靖中有黃西野出焉可當作者李時遠云副使為詩不泥法度不主故常

冲融渾化意境兩忘識者謂其衆體皆備

長相思 二首

妾夢一處所積雪滿空山覺來向人語道是玉門關  
萬里傳郎信開緘喜欲狂報得郎身健遲歸亦不妨

久雨

河東早秋風已涼况乃陰雨難禁當客子衝泥出門望

蓬蒿滿徑如人長翻飛紫燕不妨濕婀娜黃花今漸香  
歸來獨酌對山色圓笠依然戴石郎

強仕 三首

仕字甫登無錫人嘉靖辛卯舉人選授江西廣  
昌知縣遷知德州有考槃寤歌綺塋集

咏向長

子平謝累辟雅志在隱居乏食或有饋取足反其餘讀  
易深自悟人世等蘧廬謂貧富不及謂賤貴不如勅言

婚嫁畢家事無闕余同好有禽生肆意相與娛五嶽游  
躅徧高風映簡書

咏王霸

儒仲有清節始亦赴徵命造廷抗高辭不肯臣萬乘歸  
來事躬耕蓬藿掩門逕翩翩故人子相過容服盛一念  
兒曹羞客去卧不應賴有賢婦言不失初守正嘉遯遂  
終身清輝兩相映

咏梁鴻



伯鸞古賢人乃在杵臼間夫婦共守志逃名入深山淒涼五噫歌東出辭帝闕齊魯復荆吳長往遂不還為傭豈無勞顧已少外患終葬烈士旁高風邈難攀

劉成穆一首

成穆一名嘉壽字玄倩又字文孫崇慶人嘉靖

辛卯舉人有劉玄倩集

朱東器云玄倩詩文初不經意即席揮灑頗有佳者

詩話孝廉過漢武帝陵詩云歲暮霜殘過漢都武皇陵墓舊荒蕪不將玉匣藏天馬猶使金燈照野狐賦客詞園清露盡仙翁丹竈白雲孤千年惟有秋風曲渭水長流啼夜烏楊用修見而甚愛之然

按其字句尚欠  
帖妥故置不錄

### 城南送友

送汝歸南國燕山正早秋獨傷千里別同憶五陵游漢  
殿相如賦吳江范蠡舟相思同易水日夜自悠悠

高應冕

四首

應冕字文中仁和人嘉靖甲午舉人官光州知

州有光州詩選

顧玄言云文中材致清瞻聲  
調適拔平平寫出亦自沈淨

### 江上行

白日江上沒江雲滿滄洲鷗鳥各隨羣煙波何悠悠還  
將不繫心送君千里舟相思不相見極目令人愁

同張玄洲胡圓洲王曉山張元洲項芳溪江樓觀  
潮分韻

江聲秋益壯江草秋還歇夫差自亡吳子胥何怒越盤  
盤江上山盈盈江頭月此景亘千古不逐浮雲沒

江村晚眺

荒村沈夕照煙樹幾人家野渡迎潮急寒山帶月斜漁

歸無遠市鴈下有平沙寂寂秋江晚芙蓉自落花

渡湘江有感

扁舟復何去五月下瀟湘遙望蒼梧迴還憐楚水長暮  
潮下野渡遠樹帶殘陽渺渺雲山外蒼茫隔故鄉

陳 芹 三首

芹字子野系出交南國王永樂中避黎氏之亂  
來奔遂家南京中嘉靖甲午舉人六試禮部不  
第謁選知奉新縣調簡得寧鄉之官九十日謝

病歸結青溪社有陳子野集

詩話金陵社集詩序云海宇承平陪京佳麗仕  
宦者誇為仙都游談者指為樂土弘正之間顧  
華玉王欽佩以文章立埤陳大聲徐子仁以詞  
曲擅場江山妍淑士女清華才俊歛集風流弘  
長嘉靖中年朱子价何元朗為寓公金在衡盛  
仲交為地主皇甫子循黃淳父之流為旅人相  
與授簡分題徵歌選勝秦淮一曲煙水競其風  
華桃葉諸姬梅柳滋其妍翠此金陵之初盛也  
萬厯初年陳寧鄉芹解組石城卜居笛步置驛  
邀賓復修青溪之社於是在衡仲交以舊老而  
益盟幼于百穀以勝流而至止厥後軒車紛還  
唱和頻煩雖詞章未嫻大雅而盤游無已太康  
此金陵之再盛也其後二十餘年閩人曹學佺  
能始迴翔棘寺游宴冶城賓朋過從名勝延眺

縉紳則臧晉叔陳德遠為睂目布衣則吳非熊  
吳允兆柳陳父盛太古為領袖臺城懷古爰為  
憑弔之篇新亭送客亦有傷離之作筆墨橫飛  
篇帙騰涌此金陵之極盛也嗟夫日中月滿物  
換星移舟壑夜趨飲獵旦改白門有烏無樹枝  
之可繞華表歸鶴悵城郭之併非撰文懷人吁  
其悲矣謂我何求亦無曹馬覽其文者謂淋漓  
盡致盛衰今昔之感具於是矣然青溪社集倡  
自隆慶辛未而非萬厯初年也朱東器停雲小  
志云青溪自後湖分流與秦淮合當桃葉淮清  
之間有邀笛步者晉王徽之邀桓伊吹笛處也  
陳明府芹即其地為閣焉俯瞰溪流頗有幽致  
歲辛未費參軍懋謙約余為詩會其上於是地  
主則明府次則唐太學資賢姚典客澍胡民部  
世祥華廣文復初鍾參軍倬黃參軍喬棟周山  
人才甫盛貢士時泰任參軍夢榛先後游而未

入會者則張太學獻翼金山人鸞黃山人孔昭  
梅文學鼎祚莫山人公遠王山人寅黃進士雲  
龍夏山人曰瑚紀亳州振東陳將軍經翰汪山  
人顯節汪文學道貫道會沈太史懋學程文學  
應魁周文學時復癸酉復為續會則吳文學子  
玉魏廣文學禮莫貢士是龍邵太學應魁張文  
學文柱每月為集遇景命題即席分韻同心投  
分樂志忘形間事校評期臻雅道前會錄詩若  
干刻之命曰青溪社稿許石城先生敘其首續  
會錄詩若干吳瑞穀序之會余領淪郡符任參  
軍入興都稿遂散逸後方民部沆葉山人之芳  
入馬余馳書社中期稍收輯無何胡民部費參  
軍以註誤謫黃參軍以領郡行已方戶部亦因  
事出盛會不常良朋星散回首江東雲樹在望  
秦淮煙月黯爾銷魂因記舊游略次其姓氏  
氏篇什如左按此青溪社集之本末始備

折欄會和周銀臺韻

新歲詩家集深更興未闌共憐今夜月仍似去年看社  
主歡扳轄車徒怨折欄綵梅紅對酒忘卻外邊寒

秦淮煙月

秦淮煙暝水長流明月空懸萬古愁春去秋來風景別  
鳴箏夜夜酒家樓

聞笛有懷朱比部

空林寂寞雨絲絲折得梅花未滿枝正值鄰家夜吹笛



倚欄無限故人思

王鑛  
二首

鑛字公范閩縣人嘉靖甲午舉人官思明府同知有治山拙橐

送大行謝驛梅使琉球

使節分星象仙舟捧御函絲綸宣海嶽天地極東南服  
荷殊宣賜才推絕域堪遠人胥樂附異俗乃能諳父老  
相如檄詩書陸賈談徵牢宵踰十館穀日過三牛馬風

何隔金銀氣不貪兩階遐格舜九扈乍聞郊專對名非  
忝周咨迹豈慙歸航應載石赴闕及傳柑國體從茲振  
兵威不自戡梅花洋信近延佇慰朋簪

青魚灘

青魚灘上野人家曲徑疎籬長物華漠漠午烟吹不散  
鷓鴣飛出木棉花

薛 欽  
二首

欽字寅甫懷安人嘉靖甲午舉人太平儒學教

諭有東山集

詩話薛君詩頗清越近於皆山樵者曹能始序  
徐惟和詩云閩自林膳部後百餘年而得鄭考  
功又數十年而得薛  
博士具推重若是

句容道中望茅山

翠律盤江甸遙天紫翠分風塵應不到鸞鶴自為羣  
曉徑連青靄秋山徧白雲可憐句曲望不見華陽君

雞鳴寺

古寺浮仙嶂層甍近帝家洞香流石乳僧午飯胡麻金

刹盤飛鶴丹池聚浴鵝俄聞孤磬發蕭颯滿烟霞

郁蘭 一首

蘭字文芳秀水人嘉靖甲午舉人官南京刑部主事有比部橐

詩話嘉靖倭亂胡總制宗憲有捍患功及被逮繫陽川時知績溪縣事力覆護之至以去就爭願上印綬始得免羅織可謂長者今鄉曲之士知其名者寡矣矧詩乎

讀五代史

天地沈冥際山河戰伐中可憐長樂老只是愛三公

吳節一首

節字子甘江陰人嘉靖甲午舉人任江西新昌知縣

登仙阜亭

仙阜孤亭敞憑高發興新風帆斜入浦雲樹曲通津丹井迷芳草清池覆綠蘋月明歸去近涼影忽隨人

陳紹文一首

紹文南海人嘉靖丁酉舉人官通判

幾日南巡詔旋看下九霄五花邊將馬七葉禁臣貂帝  
子馳金輅神人駕石橋康衢應有頌誰為采風謠

吳旦一首

旦字而待南海人嘉靖丁酉舉人謁選為知州

有蘭皋集

詩話蘭皋南園後五先生之一也惜其集不傳

秋夕城闌納涼

同游冠蓋晚相招澤國山川正沈寥官閣迥臨秦代壘

女牆斜帶越江潮流螢草細風先動繞鵲枝長露易飄  
多少高樓人不寐碧天涼月夜吹簫

蔡宗堯 一首

宗堯臨海人自號東郭子嘉靖丁酉舉人選授  
松陵教諭有龜陵集

麗情曲

曲房過雨蕙徑空綠雲藹藹懷春風欹枕牙牀睡初醒  
臙脂汗濕羅衣紅鴛鴦牽繡絲未歇流蘇夜煖斜明月

珠簾半卷春日高海棠飛起雙蝴蝶

鍾廣漢云  
八义遺響

方效一首

效字去病桐城人嘉靖丁酉舉人有石洲集

歸途

大龍之嶺高插天石塘湖邊秋可憐稻花菊花裛寒露  
遠壑近壑屯晴煙江聲激壯自今古峽徑縈紆還歲年  
悠然獨馬渡河去日暮滄洲停客船

郭文涓二首



文涓字穉源古田人嘉靖丁酉舉人官保寧同知有享帚集

遊西山

緬維京國遊夙憶西山勝前期戒朋儕昧爽理征鐙連鑣出都門散轡遵郊徑  
厓猶望晴巒迢遞陟煙磴蒼茫紫翠分參差金碧映雲際鬱層甍風中發孤磬山光足  
怡愉池色湛清滢覺花粲奇馨慧草紛延亘梵影空中懸經聲榻前聽行恐苔痕穿嘯聞  
谷響應翠巘屢攀躋

朱闌恒眺凭取適情易酬息機意初稱登臨愜賞懷攬  
結動幽興聊茲却喧囂庶以慰蹭蹬

夜懷

疎燈孤館寂落木萬山空夜色誰家月秋聲何樹風鄉  
園歸鴈外身世轉蓬中祇益離羣意淒然思不窮

劉

熠一首

熠字元麗號東沙海鹽人嘉靖庚子舉人官監  
察御史有同春堂遺藁

# 山中風雨

春來風雨倍淒淒  
咫尺雲峰萬木迷  
竈下濕煙離突起  
庭前幽草上階齊  
夢來旅況殊鄉國  
聽去江城盡鼓鼙  
縱擬單車待明發  
子規聲已遍前溪

方輿邦 一首

輿邦字懋翼莆田人嘉靖庚子舉人官至廣西  
參議有喬村集

# 得子相書

尺素中宵慰索居美人南國意何如江淮殺氣昏牛斗  
豺虎烽煙感羽書天入蒹葭孤鴈盡秋來風雨五陵踈  
朱門鳴瑟誰知己莫漫逢人賦子虛

許邦才

五首

邦才字殿卿歷城人嘉靖癸卯舉省試第一任

永寧知州遷德府長史有海右梁園二集

魯藩中立

云空石詩倣于鱗而氣格不逮然于鱗詩多客  
氣而空石溫厚或過之謝茂秦云殿卿軒軒

豪舉傍若無人宋轅文云于鱗亟稱  
殿卿其梁園集殊不稱絕句差快意

詩話殿卿如銳頭年少騁獵平原耳後生風鼻頭  
出火長歌有云長卿慕人千載前何似與君俱少  
年子雲慕人千載後何似與君俱白首爽氣殊倫  
令張正言為之不過此也王元美贈詩云是時歷  
下李攀龍往往道汝文章伯乃卮言評詩竟  
不之及又夷之四十子之列取舍似未公也

### 寄懷元美

鴻鴈驚秋海上還片雲孤月薊門關如何昨夜西窗夢  
不道千山與萬山

### 送高都護入賀

將軍白馬插雕弧自傍屬車誇射鳥陛下聖明三萬歲

微臣直至執金吾

送謝中丞歸射洪 二首

六月江干冰雪涼射洪春酒鬱金香自從筇竹通西夏  
漢使年年出夜郎

巫峽江陵一水分猿聲兩岸夜成羣遙知月下孤臣淚  
才過三聲不可聞

留別劉公

秋風長鋏幸生還明日孤臣入楚關莫道三年人萬里

天涯消得幾重山

韓詩一首

詩字承志長洲人嘉靖癸卯舉人知永豐縣遷  
雷州府同知有勛齋詩集

小齋即事

小齋寂歷似山居池上逍遙與世疎  
盡日不通門客刺經春嬾報故人書  
捎簷細竹含風響繞榻輕雲過水虛  
願得郡中無一事十年不調更何如

戎來賓

一首

來賓先名國振字孔塘鄞縣人嘉靖癸卯舉人  
榜後更今名官南昌府通判

郊居即事

作吏才偏拙為園意頗深風塵元畏路山水是知音  
徑曲叢篁密堂虛澹月侵平生甘放浪自合蚤抽簪

梁柱臣

一首

柱臣字彥國廣州順德人嘉靖丙午舉人官灤



州知州入為刑部員外有梁彥國存豪

寄懷蘇雲谷逸士

吾鄉隱君子質素古人風性豈琴書癖身將猿鶴同捲  
簾山閣暮策杖海雲空一別麻源谷相思桂樹叢

陳所有一首

所有字彥冲莆田人嘉靖丙午舉人合浦知縣  
草堂

草堂在西林露頂避暑客來剝啄聲葛巾不知處

孫樓一首

樓字子虛常熟人嘉靖丙午舉人湖州推官有

百川集

郊西詩

上苑春偏麗西郊更可憐輕塵花半妥斜陌柳初眠綠  
樹鶯聲外青山馬首前夕陽南北淀髣髴太湖田

邵圭潔一首

圭潔字伯如一字茂齊常熟人嘉靖己酉舉人

有北虞集

蘇臺竹枝詞

魚尾晴霞片片明  
鴨頭新水半塘生  
平川蕩槳一十里  
深巷賣花三五聲

黃尚質

二首

尚質號

闕

餘姚人嘉靖己酉舉人知息縣事

遷知景州有青園錄

再過半山堂

春風重過半山堂依舊千峰入坐蒼更有好花明後院  
旋添新竹蔭虛廊畫圖想像摹雲谷詩句模糊認雨牆  
卻怪山禽似相識向余啼上卧龍岡

采茶女

結束烏椎髻攜筐去采茶歸逢鄰女笑也插杜鵑花

葉春及

八首

春及字化甫歸善人嘉靖壬子舉人選授福清  
儒學教諭陞惠安知縣遷興國知州轉鄖陽同

知召為戶部郎中有絢齋集

詩話歐陽永叔曰本刀歌云徐福行時書未焚  
逸書百篇今尚存令嚴不許傳中國舉世無人  
識古文永叔雖有是言亦詩人托興而已故葉  
少蘊馬翔仲均疑之鄭麟趾高麗史宣宗八年  
五月李資義還自宋奏云帝聞吾國書籍多好  
本命館伴書所求書目錄授之且曰雖有卷第  
不足者亦須傳寫附來目錄首開百篇尚書而  
高麗未之有也先是咸平中日本僧裔然以鄭  
康成注孝經來獻不言有尚書王暉中堂事紀  
載中統二年高麗世子植來朝宴於中書省問  
曰傳聞汝邦有古文尚書答曰與中國書不殊  
然則百篇尚書高麗且無之況日本乎萬厯初  
絢齋在郎署有命遣使臣封倭絢齋上言請多  
方索之以歸未免近於迂矣絢齋令惠安幾與

姑臧萊蕪比潔有繡衣按郡經縣治騎從過盛將  
止宿馬絢齋前曰日未旰惠安小縣豈容駐節乎  
強之去強項甚矣及解組歸隱居羅浮之石洞吟  
詠自適雖以講學聞詩宗杜陵不墮程邵門戶

飲陳巽卿宅即席賦得帝字

黃公避秦皇子陵傲漢帝萬乘彼不榮五斗吾何利邇  
來脫桎梏麴蘖聊避世田父尚不辭況乃夙同志高堂  
敞華筵上客縱橫至日暮飲未休舍坐還席地屢舞倩  
人扶歡言答賓戲因思劉參軍荷插有深意

飛雲頂

峰到飛雲絕，晴看赤日沈。  
露凝霜鬢白，龍起二儀深。  
積氣連吳楚，啼猿自古今。  
天門知不遠，乘興欲登臨。

小砢石臺

倚劒孤城暮，登臨萬壑秋。  
潮平沙岸失，月落島煙浮。  
白鹿通夷國，黃雲滿戍樓。  
南征斷消息，橫吹不勝愁。

訪詹咫亭先生巢雲書院兼呈社中諸友

二首

巢雲高不極，飛閣倚雲開。  
樹杪滄溟盡，尊前紫翠來。  
江湖雙涕淚，天地此樓臺。  
縱有終焉計，能忘國士才。



惆悵出門去徘徊流水間菊花深復泛桂樹晚重攀返  
照孤城斂寒雲大壑還朝來羈物役有夢到柴關

白雲洞口號

二首

洞晚雲隨入巖秋雨自飛莫愁霑野席猶得浣塵衣歲  
月吾將老煙霞興不違昔年招隱處叢桂可同歸

古洞何年闢長留宿白雲江山千里盡風雨半天聞芝  
朮堪時往壺觴到夜分依依乘月去猿鶴惜離羣

初春滕方伯支學憲招飲藥洲藥洲南漢離宮有



池今名白蓮池畔有九曜石

留客平原飲賢哉二大夫致身霄漢近傾蓋古今無冀  
北空良驥關西得舊儒偶然山澤叟今夕一尊俱

張鳴鳳一首

鳴鳳字羽王豐城人嘉靖壬子舉人選授府通  
判

留別黃門周公

清時落拓媿無能何事高人獨見稱朝議遽寬重譴吏

金方日人卷五十三  
聖恩因借六安丞雲山曙色催行李秋渚離心醉采菱  
夢裏亦知雙闕路幾回深夜悵殘燈

陳師一首

師字思貞錢塘人嘉靖壬子舉人有復生子橐  
潞河舟中作

夾岸垂楊青可憐出門仍是葛衣天鄉書不到東吳鴈  
客夢重尋潞水船李子貂裘重那敝王喬鳧舄幾時旋  
年來作客渾南北囊底曾無貫酒錢

吳景明 一首

景明字復陽休寧人嘉靖壬子舉人知州有西

洲集

赴西州任道中即事

灘險飛流急林深毒霧遮溪行朝避蜮山宿夜防蛇屋  
市枕柳樹籬編茉莉花從知邊徼地風土異中華

姚光虞 一首

光虞南海人嘉靖乙卯舉人官至知府



送周國雍守順慶

使君千騎擁朱幡此去誰云蜀道難  
列郡分符虞岳牧前驅負弩路西南  
湓城月色揚舲渡巫峽濤聲倚劒看  
行矣外臺今不薄循良卿相滿長安

鄧元錫

六首

元錫字汝極建昌新城人嘉靖乙卯舉人徵授翰林院待詔學者私謚文統先生有潛學藁

擬古

人皆願延年延年欲奚為一夕復一朝忽與百歲期誰  
能繫西日長挂扶桑枝羣流赴巨壑寧復有還時劉安  
將雞犬八公徒愕眙秦皇與漢武但為方士嗤

雜言別傅陳二友

羲娥無停轂節序忽變更柔條奮翹柯原隰何青青往  
者日以徂來者日以榮嗟余至寡劣晞聖徒有營邁往  
信不力逾覺時序傾我身所以立豈不恃友生奈何同  
心侶中道各有程戚戚增紆思薄言寄深情

古詩送王子仁

噓物寧非風風勁物乃戕駕車寧非馬馬疾車以僵百  
獸伏駒虞衆禽景鸞鳳豈無鷹隼姿搏鷙難為良

別江子

良農程歲功豐凶非所諳良賈經儲積利鈍皆所甘曾  
以水旱故棄捐任與負曾以貿易薄棄捐絲與布十年  
經世業料理亦有素奈何乘輶輶中達思改驚人生各  
有職治職各以勤永誦蟋蟀篇愜然念先民

初夏登眺天峰

江城開宿雨孤嶠共躋攀  
龍氣留蒼壁鶯聲響碧灣  
危峰斜帶郭幽徑曲盤山  
不淺東林興迢遙未忍還

途中雜詩

河水走平土郡邑何偏側  
君莫問河防河防無上策

周式南

一首

式南字仲翰吳江人嘉靖戊午舉人以孫宗建  
貴贈太僕寺卿

萬松巖

為愛山幽選勝來城南絕巘翠屏開澗邊黃葉自秋色  
門外落花空古臺松影半分禪榻靜潮聲一道海門回  
聖朝欣覩平夷頌欲賦長楊媿不才

劉魁一首

魁字煥吾秦和人由舉人選授寶慶通判移知  
鈞州遷潮州府同知入為工部員外郎諫徙雷  
壇廷杖繫詔獄者再以宮禁火赦還有晴川集



詩話永陵好道詔徙雷壇於禁中曰雷霆洪應  
之殿有壇有城有蟲雷軒有嘯風噓雪靈雨耀  
電之室有清一齋有寶淵門有靈安精營輔國  
演妙之堂有八聖居有馭仙次各懸以額又別  
建凝道雷軒帝畫日常御之其始作也晴川疏  
請停止帝怒予杖繫獄與楊伯脩周順之講學  
囹圄中是年八月西苑神降於乩請宥三臣乃  
得釋俄復逮繫明年宮禁火放還晴川陽明弟  
子也郡人鄒公元標合三  
人詩刊之題曰三忠文選

### 過德州次訥溪韻寄斛山

纔過滄州又德州綠楊堤岸菊花秋未論秦楚萬餘里  
且共風波一葉舟農圃漁樵俱是侶江湖廊廟敢忘憂

獨憐腰脚差還健有約同登華岳遊

張燾

四首

燾字水波南昌人由舉人仕至府同知有崇古  
堂橐

先鋒樓

噫嘻哉延城之山高兮天際頭況此城上更架百尺先  
鋒樓登樓一望覽無際但見萬里蜃氣滾滾直與蒼天  
浮三峰九溪不暇數時有倭雲刺日出沒亂我雙吟眸

憶昔使君提兵駐此地雄據八郡當襟喉生靈百萬賴  
保障勞集不讓高密侯爾來兵力日綿薄肉食誰為天  
王謀向來鄰郊有小警遂使五嶺欲撼杉關愁噫噦哉  
粵山如昨粵水流壯士一去天悠悠東南獠獠尚可語  
西北烽煙誠足憂去年邊軍下井陘遂使烽火通幽州  
令人拊髀歎不已投筆每為班生羞安得使君溪前伏  
劍起直走塞下一鼓甲士皆貔貅漠南河西羌種盡歸  
順從此玉關遣戍空防秋

秋思 二首

本朝宣大屹秦關北轉河戎部落間魏闕頻看優詔下  
玉關誰唱凱歌還黃沙鼓角野狐嶺白日羊駝天馬山  
節鉞不來楊石遠蚤秋烽火照愁顏

中原舊服緣河套百戰翻成縮內邊空使健兒遺白骨  
不聞中帥給青錢六羸徑入榆林寨衆鴿橫飛好水川  
安得征西班節使坐收氐海淨烽煙

康山忠臣廟

高王卷甲南征日掃蕩亡陳向此洲焚炬未應誇勝算  
覆巢原已盡先籌江東父老空憐楚垓下山河盡屬劉  
寂寞康山湖上廟至今煙雨不堪秋

李 蔭 一首

蔭字襲美內鄉人官刑部主事有五遊集

雪霽登雲門山

晴雲落澗春水鳴好風吹人衣袂輕有山如此不一醉  
啼鳥可憐空數聲碧石崔嵬跨絕壑白雲爛漫連孤城

楚客興來每獨往  
浩歌不減昇天行

張邦伊 一首

邦伊字孺覺鄆縣人以父時徹廕仕至陝西苑  
馬少卿

沈嘉則有三楚之遊席上得分字

春城斗酒惜離羣  
把袂高歌到夕曛  
地入衡廬三楚盡  
天迴襄漢九江分  
停舟夜聽湘靈瑟  
倚閣朝牽鄂渚雲  
知爾尚平家累淺  
逢人勝事好相聞

仲春龍 一首

春龍字原仁秀水人以太學生選授文淵閣中書舍人有九山樵子集

少年行

鏤金鞍子百花裝三尺流虹飲血光  
白日報仇官市上青春調笑酒壚傍

潘緯 一首

緯字仲文一字象安歙縣人入貲為武英殿中

書有養疴遊淮園居諸集

王仲房云仲文年少攻詩不甘常調雖羽

翼方翔而風力厚負

閭門尋周公瑕王和仲所居不得

閭門九陌通車馬往來逢入郭尋舊識望閭迷舊蹤空  
停秋江棹漫聽寒山鐘相隔城闌裏煙雲凡幾重

項元淇 一首

元淇字子瞻秀水人光祿署丞有少岳山人集

皇甫子循云子瞻古選冲逸五言典雅七言清婉



同陳白陽登閣

月宇臨清桂星筵拂絳河已投車轄飲兼倒接離歌砧  
杵催秋急風煙向晚多春波門外路乘興數經過

周錫 三首

錫字子純太倉人嘉靖中以薦授潮州府通判  
有南遊東山蒹葭得已諸集

詩話子純下筆不休間有合作相傳攝潮陽縣  
印巨寇楊三摠林大帥率黨千人駕三十艘壓  
境警報踵至子純徐曰鼠輩爾何能為衆皆懼  
子純挾弓矢上馬引滿射三發三中的桴鼓應

卷五十三  
之擊走三摠擒大帥以  
歸縣境以寧洵豪士也

### 海豐道中

長夏苦于役炎風吹鼓輦山深榕子落雨急鷓鴣啼野  
渡從流下斜陽在竹西極知行路險愁殺嶺雲低

### 茅屋

茅屋自成趣況丁離亂中敲冰兩孺子曝背一衰翁客  
至村醪薄樵歸樹葉空三江十萬戶安樂幾人同

### 吳門夜泊

谷口揚帆風正急野亭雲木雨霏霏晚來城郭維舟穩  
老去湖山見面稀十里煙光開疊嶂兩崖樓閣帶斜暉  
夜深欲傍寒山寺依舊鐘聲落翠微

吳承恩

七首

承恩字汝忠淮安山陽人長興縣丞有射陽先

生存豪

陳玉叔云汝忠緣情體物其詞微而顯其旨博而深淮自張文潛以後一人而

已李本寧云汝忠與徐子與最善往還倡和  
今按其集獨不類七子率自胸臆出之以彼其

才僅為縣丞以老一意獨行無  
所扳援附麗豈不賢於人哉

詩話汝忠論詩謂近時學者徒欲謝朝華之已  
披而不知漱六藝之芳潤縱詩溢縹囊難矣故  
其所作習氣悉除  
一時殆鮮其匹

## 對月

人言天上月中有姮娥居孤棲誰與共顧兔銀蟾蜍冰  
輪不載土桂樹無根株紛紛黃金粟歲歲何由舒一閉  
千萬年玉顏近何如相違不咫尺照我闌干隅一杯勸  
爾酒為我留須臾

富貴曲效溫飛卿體

燒燭迷妝閣春旗隔步廊兩眉京兆畫三日令君香裙  
窄芙蓉衩釵危翡翠梁羨他雙海燕先占鬱金堂

楊柳青

村旗誇酒蓮花白津鼓開帆楊柳青壯歲驚心頻客路  
故鄉回首幾長亭春深水漲嘉魚味海近風多健鶴翎  
誰向高樓橫玉笛落梅愁絕醉中聽

田園即事

大溪小溪雨已過前村後村花欲迷老翁打鼓保社裏

野客策杖官橋西黃鸝紫燕聲上下短柳長桑光陸離  
山城春酒綠如染三百青錢誰為攜

秋夕

竹火煎茶寺菱歌載酒航人間秋夕好第一是錢唐

東未齋陶師

牀頭社甕鷺兒熟江口春船石首來欲就吾師謀一醉  
講壇何日杏花開

勾曲

紫雲朶朶象芙蓉直上青天度遠峰知是茅君騎虎過  
石壇風亞萬株松

曹大同

二首

大同字子貞南直隸通州人由歲貢生授光祿  
寺署丞有玉芝樓集

秋日田居

屏居謝人徒朔風吹寒雨遠樹既盤紆漂雲亦交互愁  
鷗戀故林隱豹諳長霧羃羃川光昏蒼茫野火聚耳目

暫無擾閒情託豪素拙訥罷干時賞心於此遇飛光忽  
我適咄咄歲云暮眷言採三秀顏齡儻能駐

遊仙

有道百靈初無名萬物始九氣煉中和三元謝甲子化  
昇隨感遷清越徹表裏玄圃御斑麟丹丘乘赤鯉左拍  
浮丘肩右躡羨門趾山成數寸塵海無三尺水長嘯宇  
宙外超然得不死

張循占一首



循占字元易蒲州人官光祿署正有嘉樹齋  
軍城秋夜

寂寞軍城暮浮雲暗斗杓戍樓人未散絕塞馬仍驕  
夜雨千門冷秋風萬木凋籌邊王相國金甲未應銷

錢元鼎 一首

元鼎字實夫桐城人鴻臚寺丞

偶出

卧榻淹三伏肩輿出早秋青溪通小市香稻滿平疇有

約過鄰舍忘機對水鷗已成迂懶性身外更何求

沈堯龍

一首

堯龍字易之湖州人由貢生官鹽運司有列藝

集

丙寅誕日

年來蹤跡逐風塵忽感懸弧笑此身白髮有時還到我  
青山何處不容人漢家鹽鐵鎔銖重楚國旌旗日夜新  
且與蘋洲亭上客一竿春水共垂綸

魏學禮 二首

學禮字季朗長洲人以歲貢選鎮江訓導擢國子學正陞廣平同知時與劉鳳齊名合刻詩曰

比玉集

李時遠云季朗辭鋒甚銳當勝子威一籌

昭君怨

翠袖辭金殿青苔闕紫宮香寒羅帳曉春盡玉階空  
明月琵琶曲驚塵朔漠風 一作豔態消衣上悲情落管中 君恩原未薄妾

夢向來同

贈黎仲子

伊人結客少年場芳草長亭正夕陽忽見雙魚來萬里  
始知尺素下三湘布衣然諾輕朱建冠蓋縱橫憶鄭莊  
郢曲自來多白雪遲君早晚賦長楊

孟思一首

思濟縣人通判有龍川集

秋夜期友不至

西風散秋聲搖我庭間樹月寒草露光山靜星河曙林

鳥相向啼昆蟲紛若語美人期不來幽客徒凝佇

周沛 三首

沛字允大紹興山陰人有浮峰集

詩話周氏宗譜不言允大登仕籍而徐文長集有哀周鄭州沛二詩

別顧孝常

馬離鳴故羣人去懷心知憶昔邁君始意氣如連枝如  
何倏離別旦夕殊歡悲滔滔斯世士孰與吾心期言念  
古之人同心不同時同時復睽隔何用同時為

冬日

滯靈迫冬日山川掩重岡引領望郊邑遠樹鬱蒼蒼浮  
雲馳白晝迅風激衣裳中野少逢人乃見鳴鴈翔我有  
一束書因之以遠將其多至萬言其音悲且傷終以重  
見辭翩翩各一方攬涕下長坂躊躇不能忘

紅羅女

山東之賊紅羅女用兵迅疾如風雨白蓮授術成妖精  
能令照鏡生公卿海內承平日已久乍見干戈皆卻走

驅馳費盡中丞心羽書未報收刁斗紅羅女爾非男子  
身蛾眉粉黛當青春跨馬彎弓無可樂何用風塵來殺  
人山間小民饑餓苦日辦官需夜猛虎貧賤那堪更亂  
離慎勿橫行到吾土

張之象 二首

之象字月鹿一字元超松江華亭人以太學生  
入貲選授浙江布政司經歷有剪綵翔鴻聽鶯  
避暑題橋猗蘭擊轅佩劍林棲隱仙秀林新草

諸集

莫子良云元超詩爾雅冲澹興寄寥遠

春日遊燕子磯

古稱秉燭遊行樂恐迨暮策駕尋名山居然得真趣展  
宇開霽旭熙陽斂昏霧雲錦被奇峰水鏡含芳樹眷茲  
風日佳開觴藉蘭杜頗懷披襟友諸美難具晤流鶯稍  
出谷飛花已盈路暢哉人境外屏跡遺世故勿為京洛  
士緇塵染衣素

梅花落



玉樹飛花早金閨引恨長雪明難見影風急易聞香舞  
處飄羅袖歌邊繞畫梁歲華顚顚盡魂夢憶遼陽

楊文卿一首

文卿字子質鹽山人稷山知縣轉南京都察院  
經歷有鷗海集

秋日送曾公子實卿之延書扇頭

車馬翩翩送客行離愁遽逐海雲生三杯籬落菊花節  
一路蛩蛩豆葉聲荒草濁河連古戍悲笳明月動山城

鯉庭趨後勞相報婚嫁如今累尚平

朱永年 一首

永年字仲開儀真人官光山知縣有朱仲子集

李時遠云仲子  
詩有曠達之趣

詠懷

南鄰競歌鐘北里吹笙竽我獨甘寂寞守此貧賤廬蓬  
戶不掩葦簟瓢常晏如負郭住窮巷門無長者輿彈琴  
發雅操誦詠詩與書安神在閨房愴泊思玄虛至人求

髣髴榮名非所須

丘雲霄

四首

雲霄字凌漢崇安人嘉靖十七年貢士選南京國子典簿遷柳城知縣有止止齋集

詩話止山駭驚作吏解組歸田栖息武尼山中閉關講學嘗與其友夜宿高明樓中夜有怪倚門作人語曰同遊不樂乎何卧之早也止山應之曰我載晨而遊抱白而歌汝何不吾和而同其樂何為昏暮而來也怪應曰不能止山曰吾亦不能怪歎息而去可謂不惑不懼者已松陽徐夢陽評其詩稱其雅澹勁古景真情得要之蹈襲前人異乎七子之派者也

溪月初出水

溪月初出水照我清夜堂  
沈憂不成寐踟躕步寒光飛  
鳥深夜號遶樹林煙蒼有懷空自知默默心摧傷

怨詩

江石如龜甲隱隱浮明沙  
不障東之水偏驚遊子查  
遊子去鄉國長風吹斷霞  
斷霞只在天遊子去無涯  
泠泠秋已老飄蕩未還家

寒露同李洗松宿方塘書舍

露重憐今夕秋深試薄寒溪聲亂籬落月色動柴關菊  
密欲藏徑花嬌故傍欄相看疑夢寐秉燭問更闌

### 江晚

帆勢迎風疾灘聲入暮諠漁燈出疎樹客路問前村野  
鶴冲煙迴山花帶雨昏寒江何處宿幽思未堪論

### 施漸 三首

漸字子羽無錫人歲貢生授海鹽縣丞有武陵

集

王元美云施子羽如寒鴉數點流水孤村惜  
其景物蕭條迫晚意盡  
俞汝成云子羽趣

味悠深聲調雅雋

在韋柳錢郎間

詩話子羽僅初舜咨與華子潛酬和時號錫山四友三君皆非華敵子羽差優

### 贈人遊蘭亭赴陳山人約

靄靄深竹林  
林深阻修澗  
清川流其間  
懸崖俯可辨  
春蘭日以芳  
風氣日以變  
君往對山人  
如逢昔人面

### 贈吳還

山人為客吳門久  
白髮蒙茸將被首  
興到青山不問家  
笑來花肆常沽酒  
行路蕭然滿篋詩  
風流文采雅堪師

自言身是陶弘景說與世人誰得知

竹房

寂寂春窗下惟餘修竹陰忽聞人共語送客出深林

李才一首

才樂安人舜臣子官主簿

雲中寄周總戎

雲中日夕傳烽火萬里邊風羽檄催邊騎長驅光祿塞  
漢兵不度白登臺三關鼙鼓秋何急七郡蒸黎日轉哀

試問漠南諸將士只今誰是出羣才

巖

怡

三首

怡字士和如皋人以貢為博平訓導有石溪集  
擬古

采采南山桐十年成一琴製者豈不苦謂世有賞音持  
以奉君子不與我同心擬鑄鍾子期家無雙南金

石人

高岸勢若崩上有誰家墓已無墳上土尚有墳前樹樹



下多行人車馬成廣路此地少豐草幸免穴狐兔石獸  
半埋沒碑版知何處往者盡如此來者永不悟石人不  
解語空泣草頭露

曲塘

土牆茅屋竹籬笆楊柳風高燕子斜可是曲塘人好事  
家家屋角有桃花

李奎一首

奎字伯文錢塘人以布政司吏再考錦衣從事

有珠山集

彭子殷云珠山詩一以興象為宗篇多渾融句多藻緻讀之爽氣滿前

詩話伯文周旋沈青崖於獄中者以氣義聞詩特寄興也

採藥

山中宿雨過嶺上明霞赤荷鋤入南畦藥苗始堪摘黃精種未鋤紫芝已盈尺隔水望茅茨還歸煮白石

明詩綜卷五十三

欽定四庫全書薈要卷二萬五百二十七

集部

明詩綜卷五十四

翰林院檢討朱彝尊編

萬表

六首

表字民望鄞縣人正德末中武進士累官都督同知僉書南京中軍都督府晚號鹿園居士有

玩鹿亭藁

顧玄言云鹿園才清思逸稟履高曠詩如空巖曲瀨宛轉寥曠時復滴瀝

得幽閒真趣有韋應物

深致七言氣骨稍弱

靜志居詩話鹿園裴帶翩翩志存開濟好從方  
外遊間與羅達夫唐應德諸公講性天之學值  
倭寇為患守土者力不能支公遠結少林寺僧  
傳松關之法倭猝犯赭山公使釋孤舟統其徒  
二百人薄倭營縱火前擊敗之俄太倉來乞師  
公別募月空等十八僧選經師天員為將戰於  
翁家港諸僧衣錦袈裟持杖口含激藍遇賊以  
藍塗面白地躍起若保鬼前搏倭大驚以為神  
遂大敗倭追及嘉興之白沙灘盡殲焉後遷官  
留都道出蘇州卒遇寇楊涇橋孤軍與戰得出  
身中流矢以書報家人曰家世死戰惟吾持文  
墨論議未嘗身將兵今晚年增一箭瘢可無憾  
矣蓋萬氏自武略將軍斌戰死阿魯完河子指  
揮僉事鍾與靖難兵戰死花園孫明威將軍武  
從征交趾師次壇舍江陷陣死武弟文襲兄爵  
守桃渚有龍夜戲潮浮水面遙望兩炬光以為

賊火引強弩射之應弦落其一炬不知為龍目也龍負痛騰躍文船漂沒人稱射龍將軍三世不得裏骨歸葬故鹿園書云然鹿園子達甫仲章鎮國將軍孫邦孚汝永都督僉事皆材勇文武達甫有皆非集邦孚有一枝軒橐題江心寺云清啓龍聽法空階月送潮此仲章警句也

### 憫黎吟

三首

參政平崖錢公出憫黎諸詠見示惻然傷懷因而有作

地何產枲與速民何畜豕與犢豕犢盈盤吏反嗔枲速窮年采不足刻箭為約安得銷

黎人借錢無約刻箭記之

歲歲生當

剗吾肉負戈因拚一命償嗟嗟黎人誰爾牧

虎兕來猶可奔狼師一來人無存大征縱殺玉石焚昔  
人鵬勦只一村鵬勦功成賞不厚大征廕子還廕孫殺  
一不辜尚勿為何況萬骨多冤魂

鑿而飲畊而食撫黎何事來相逼

舊設有撫黎老人

瘠牛可畊

豈不惜薑水那堪吞滿臆

撫黎逼黎人之財則以薑水灌之

遙明鐙火

忽驚疑一望旌旗我心惻

撫黎至黎則明鐙揚旗以往

羣黎草木豈

有知貪吏腹削無休息攻掠犯順誰所為撫黎毒黎還

主母國

夏日飲許員外山亭即景

一亭梧竹裏迴出市塵間  
石逕緣蘿入江峯對座閒  
海雲朝屢變山鳥暮雙還  
別去衡茅下思君懶閉關

江南曲

客從潮陽來夜泊秦淮口  
鄉語人不知兒童聞拍手

宮人歎

莫向雲屏羨阿嬌暫將清泪度  
春宵帶圍自此拚長減

待得君王愛細腰

劉 銳一首

銳字蓄之海鹽人世襲海寧衛指揮使有春臺

集

錢幼卿云海村抽簪邁軸寓意詩篇  
與瀛洲詩老和剛卓然自振於倚伍

詩話海村少補諸生屢試不利乃食世祿里居  
賑飢散藥以厚德聞有僕名木善射一日水鷗  
集資聖寺鷗吟木射之貫其左嗣鸛帶矢盤旋  
良久竟集中庭如臆訴者海村曰嘻必木也命  
拔其矢縱之不能飛乃命木飼之旬日創愈  
向主人鳴舞翔翔而去海鹽人至今能道之

和徐東濱



何處幽棲好城西有茂林山來當戶翠竹長隔牆陰哺  
子飛梁燕窺魚下水禽閉門無所事赤日任流金

余承恩

四首

承恩青神人官永寧叅將有鶴池詩集

詩話鶴池為太保肅敏公孫肅敏有社稷功世襲錦衣衛指揮其子忤權倖調外衛故鶴池終

身不得侍禁纂詩集八

卷銅梁張肖甫序之

感興

白日沈西陸返景流東岑端居屏塵翳欣然理鳴琴大

雅僉不悅馳情在鄭音違俗信靡合安可同荒淫達人  
宜止足嘉遜我所諶富貴苟非義一唾麾千金

答草池約汎蓉溪

春來花鳥總關情夜雨愁聽不到明怪殺主人猶病酒  
晴江鼓柁放舟行

泛舟

芙蓉溪水三尺強蒼蒼兩岸花草香若待長江新漲合  
撐舟直上小茆堂

望忠州

高江落日片帆秋  
岸上漁罾次第收  
無數峰巒雲霧裏  
舟師指點認忠州

戚繼光

二首

繼光字元敬登州人世襲衛千戶以叅將備倭  
浙東大破倭於台州以副總兵鎮福建大破倭  
於平海衛閩寇既平以都督同知召理戎政出  
為薊鎮總兵進左都督加少保卒諡武毅有止

# 止堂集

詩話少保平倭之功戰勝攻克撰有紀効新書  
在薊日與總制譚公綸搏俎折衝撰有練兵實  
紀論者比之孫吳韓白馬軍中有暇輒與文士  
接席賦詩集名止止橐曰愚愚居曰夢夢是亦  
好奇  
笑

## 盤山絕頂

霜角一聲草木哀雲頭對起石門開朔風鹵酒不成醉  
落葉歸鴉無數來但使凋戈銷殺氣未妨白髮老邊才  
勒名峰上吾誰與故李將軍舞劍臺

度梅嶺

溪流百折遶青山  
短髮秋風夕照間  
身入玉門猶是夢  
復從天末出梅關

俞大猷

一首

大猷字志輔晉江人世為百戶嘉靖中舉武進  
士累官都督同知佩征蠻將軍印進右都督卒  
贈左都督謚武襄有正氣堂集

挽薛養杲

伐木風不還今古幾心知我與君結契相期弱冠時平生一然諾盛衰永不移我善君相助我過君相規嗟君忽奄逝一老不愁遺昔為暫離別今作長相思戚戚重戚戚良朋今有誰

張通一首

通鳳陽人官至都督僉事

遊西林菴

野寺蕭條一徑微山僧相見語禪機雲深石洞元猿伏

煙鎖松林白鶴歸上界疎鐘通碧落邊城鼓角送斜暉  
浮生自覺渾無定欲解鳴珂問釣磯

周于德一首

于德號南墩淮安人官至京營都督僉事

平烏刺江

春蒐馬跡遍南荒夷獠新降罷畫疆絕壑危巖通鳥道  
飛旌疊鼓遶羊腸黔瀘東下歸辰浦箐砦西來接夜郎  
王化遠行銅柱外炎州萬里盡梯航

張元凱十一首

元凱字左虞吳縣人蘇州衛指揮有伐檀集

元王

美云將軍詩格務躋武德貞觀其語寧有瑕璧而無完珉珞汰陳而使之新非有沈深劇刻之思未易

致也

詩話左虞西苑宮詞高出元美之上元美比於沈慶之曹景宗仍以武夫遇之未為知己也

春日游西苑

宣室臨西苑靈臺對籍田宮鶯迷綠雨殿馬飲清川柳引金堤直松含玉殿圓先皇受釐處寂寞鎖春煙



西苑宮詞 十首

肅將上帝祀明堂寶鼎昭回日月光九獻不須歌舊曲  
詞臣昨已撰芝房

秋殿清齋正受釐迎和門外立諸姬大官不進麒麟脯  
御饌惟供五色芝

陳詞瘞玉奏鈞天西苑宮牆近籍田水旱恐煩祠后土  
未央深處好祈年

千峰千里照甘泉一紙降魔勅已傳急遣六丁乘羽駕

火輪金甲淨幽燕

靈藥金壺百和珍仙家玉液字長春朱衣擎出高元殿  
先賜分宜白髮臣

通天臺上接三台景命重臨清醮開拜舞不同郊社禮  
科儀一一聖人裁

香通紫氣靄晴空靈貺神休集聖躬垂拱萬年如一日  
禮臣何必議青宮

金符寶笈護雲英鸞鶴銜將入上清拜受玉霄龍鳳簡

元陽象一字分明

蓬萊方丈可梯航  
勾漏丹砂近寄將  
昨貯銀山高幾許  
試將玉尺殿中量

瑞氣祥雲薄海濱  
遠藩齊獻百千春  
進來白鹿高於馬  
馴擾金堦不畏人

李元昭一首

元昭字用晦杭州人  
世襲千戶有岫巖山房集  
送周虛巖歸吳

返棹歲將晏離亭酒共斟

一作亦深

島雲寒沒影江日凍生

陰莫惜飄蓬跡應傷折柳心丘中別同調聊復理鳴琴

黃喬棟

一首

喬棟字以藩晉江人官叅將

半峰菴聽秀上人彈琴

高僧理鳴琴古調盈人耳  
濤生松下風龍起鉢中水  
聽罷猶冷然月出疎篁裏

張如蘭

一首

如蘭字德馨南京羽林衛世襲指揮官至淮徐  
漕運叅將以子可大貴贈特進榮祿大夫右都  
督有功狗集

吳門夜泊

帆影初抽落日斜江橋風湧太湖沙行人莫上蘇臺望  
無復吳王苑裏花

狄從夏

一首

從夏字以忠臨清衛人官叅將

月夜同劉天山作

孤館寒燈夜相看聽晚笳清宵醒客夢明月落梅花碧海潮聲急清霜雁影斜不堪憐歲暮況復是天涯

袁應黻一首

應黻字仲子揚州興化人守備

鄭司馬入塞歌

十載籌邊鬢欲秋玉門生入未封侯君王豈惜師中命尚有山陰十六州

奚汝嘉 一首

汝嘉字子美江都人揚州衛百戶

旅懷

十日雨初霽一年春已殘  
苔痕蝕徑滑草色釀陰寒  
昔悔從軍易今悲作客難  
殊方有桃李能得幾回看

陳鶴 十首

鶴字鳴野紹興山陰人世襲百戶有海樵集

王敬

美云鳴野詩韻宕悽惋  
擬貞觀以還晚得大厯中格  
顧玄言云鳴野詩初  
錢去病云海樵

七古流麗似李頎七  
絕爽朗似王昌齡

詩話海樵家居怪山之麓金庭間老其女夫也  
山上有息柯亭傳是閻老所建而海樵集中酬  
周山陰張會稽攜酒見訪之作中云相攜直上  
息柯亭恐是海樵故宅中物矣五言如近海潮  
通郡連山瘴入樓山川留別夜風雪望鄉人孤  
月長隨棹寒潮自到門繞廬松葉暗穿竹水聲  
齊明月幾家好故人今夜俱七言如牀下鳴蛩  
偏入夜風前白紵不宜秋風塵會面猶難卜世  
事傷心只自知細雨殘燈歧路酒清江紅葉寺  
門舟薄遊雨見雁歸塞多病却憎花滿樓高士  
遠栖滄海曲好山多近永嘉場山深倦鵲猶依  
樹風定飛螢忽上樓比於田水月雖才鋒不及  
而鑄詞

差醇



夜坐見白髮寄別朱仲開張甌江

坐久北風起江聲帶遠沙客愁初到鬢鄉夢不離家林  
靜無殘葉燈寒有落花懷君夜難寐別緒轉如麻

高郵贈龔山人

近苦江東水轉憐淮北居入秋嘗白稻留客鱸青魚樹  
柵春收犢穿潮夜灌渠期君結鄉社同著養生書

泊京口望金山寺

南徐一片石千古柱中流繞樹開僧舍緣空結梵樓疎

燈明水底落月挂潮頭向晚禪鐘起風吹到客舟

題楊法部容閒閣

閣傍江城外窓開雲水間祇因塵境遠自覺主人閒  
日落見歸鳥月明看遠山移船候潮至相送野僧還

寫山水

夜來風雨惡落葉打柴闌曉起敞溪閣亂雲猶在山

題畫贈姜明府

暮雲春樹路千重雪後看山到處同夜永燈寒無過客

月明江色滿樓中

送張伯淳還關中

憐君獨棹渡黃河西北山川入雍多  
料得到家春未至馬蹄半在雪中過

送王諫北上

東去春潮到驛門半江風雨近黃昏  
由來知己難為別不是殷勤戀酒尊

吹笛懷友

玉笛橫吹入夜分中天華月度流雲茗川兩岸春風起  
飛盡梅花不見君

池上聽陳老琵琶

夜深池上弄琵琶萬里銀河月在沙莫向尊前彈出塞  
只因邊將未還家

陳第  
十二首

第字季立號一齋連江人初為學官弟子俞都  
督大猷召致幕下教以兵法起家京營出守古

北歷遊擊將軍有寄心集五岳兩粵游草

詩話一齋投筆從軍受知於譚襄毅俞武襄戚  
武毅三公江陵既沒論者謂武毅不宜於北徙  
之嶺南一齋作塞外燒荒行有云年年至後罷  
防敵出塞燒荒灤水北枯根朽草縱火焚來春  
突騎飢無食又云隆慶二載譚戚來文武調和  
費心力從前弊政頓掃除臺城兵器重修飭迄  
今一十五年間閭閻雖犬獲寧息譚今已死戚  
復南邊境危疑慮叵測患難易共安樂難念之  
壯士摧顏色論者不引今昔觀紛紛搜撻臣滋  
惑又送戚都護絕句云轅門遺愛滿幽燕不見  
烽煙十六年誰把旌麾移嶺表黃童白叟哭天  
邊誦其詩扼腕於封疆之事深矣一齋儲書最  
富余嘗游閩臨發林秀才侗持其後人所輯世  
善堂書目求售燈下閱之見唐五代遺書琳琅

滿目如披靈威唐述之藏多平生所未見不覺  
狂喜秀才許至連江代購踰年得報書則已散  
佚徒有惋惜而已

歲暮客居呈弱侯

仲尼本周流忽發歸與歎意在就六經匪為思鄉串嗟  
我老無聞託興遊汗漫邈想古通人反側常宵半秣陵  
一君子少小登道岸嗜學自性成義易旦夕翫近得從  
之談恍上中天觀詩書數千載立語窮真贗欣然遂忘  
家何知有歲晏

邵武舟次

樵川泛輕舟青山起當面薄霧頻往還奇峯互隱見  
灘灘若峻坂下下如飛箭秋容西楚同人語南方變茂  
樹雜村煙澄溪勝江練始知溯洄艱轉喜隨流便對景  
持一杯慢亭未足羨

禹碑行

岳麓神禹碑何年鐫刻之真蹟雖莫窺字體殊瑋奇儼  
如冠冕之獨立矯若鳳鳥之來儀或盼而連目或聳而

並肩或展而雙足或握而兩拳神藏蘊蓄意騁踴躍既  
非鳥跡之踏踏亦非垂露之涓涓篆隸八分抑又邈焉  
計歷年之既久何點畫之新妍豈鬼神之默護故歲久  
而彌鮮據譯讀之恍惚未必當日之真傳余過長沙弗  
覺偶至湘潭返船直肩輿而迅步遂冒雨而陟巔喜胸  
襟之豁滌獨坐翫而弗旋昔韓退之嘗千搜而萬索至  
咨嗟而涕漣余實迷途之未遠無亦此生之宿緣

山中早秋



春夏詎能幾淒淒白露還秋容先到草客意未離山石  
鼠窺禾去清蟬抱樹聞人生衣食外焉用苦間關

### 江心寺除夜

偶過江心寺何期又歲除百年俱逆旅信宿即吾廬岸  
隔遙沽酒厨寒剩煮魚客游隨處好鬢髮任蕭疎

### 客中立秋

蒸濕前朝雨淒涼今夜風秋聲先蟋蟀露氣到梧桐頓  
覺絺衣薄尤憐旅橐空潞河問舟楫明月向吳中

閩關旅夜

已是吾鄉土離家尚十程疎窓通野色孤枕傍松聲  
搖落秋難賦悲歌夜不平僕夫催曉發燒燭待雞鳴

南岳舟中

吳門一水接楚塞衆山連書史同昏旦江湖且歲年  
洲迴蘆莽莽檣動燕翩翩何處爲南嶽雲開望杳然

維揚謁文信公祠

萬死艱難地千秋伏臘新山河終破國天地已成仁江

橘南中像巖松雪後春徘徊歌正氣不覺淚沾巾

過薊州

燕京八千里復作薊門行剩有溪山興能忘沙塞情朔  
風摧短草寒月近長城流涕二三策何人似賈生

追懷宜黃大司馬譚公

昔年飄泊入燕京制府憐才意不輕獻策獨過司馬署  
分符旋赴薊州營祇誇相國知韓信無復功臣妒賈生  
秋草春風今日淚不堪回首楚江城

元夕宿泉州洛陽橋

春風又渡洛陽橋  
柳色青青伴寂寥  
回首故園今夜月  
滿江燈火上寒潮

李言恭

六首

言恭字惟寅岐陽武靖王裔孫襲封臨淮侯環  
衛侍直留守陪京加太保有青蓮閣貝葉齋游

燕諸集

穆敬甫云臨淮詩清遠有調庶幾大厯  
中語 胡元瑞云敬美序臨淮詩郭定

襄後一人咸謂實錄予  
以惟寅文雅尚當過之

詩話李惟寅詩如四姓小侯橋門列  
席雍容韋帶味咤彭聃之氣郁盡

# 花朝

二月寒猶峭燕山雪未消  
春來無草色病裏又花朝  
鴈鄉書斷闕河旅夢遙  
武陵溪上約今已負漁樵

## 賦得匡廬山

匡廬凌碧落青磴與塵分  
湖海遠還見雷霆低不聞  
石門鳴宿雨瀑布濕流雲  
獨有山人屐常隨飛鳥羣

## 送陳玉叔郡守淮陰

別思深難遣離魂暗欲銷人隨流水去心共暮雲遙野  
市懸高岸江城響夜潮所嗟相憶處風雨正蕭蕭

送仲弟南還兼懷老親

無限離愁匹馬前況多風雨斷鴻邊板輿未得歸潘岳  
春草何堪送惠連伏枕夢回滄海月登臨望極白雲天  
飄零若見高堂問雙鬢休言異昔年

李僉憲招飲黃鶴樓

勝地慚非作賦才清尊今向大江開當年黃鶴雲中去

何處梅花笛裏催

一作來

風起

一作卷

潮聲喧島嶼日斜帆

影上樓臺相逢俱是他鄉客衰草涔陽漫復哀

### 顯靈宮

先帝祈靈太乙祠重來空憶翠華旗殿中香火儀猶具  
海上仙人事轉疑客與方書閒指畫老來詩律舊心思  
調高身健慚時輩高閣憑闌眼故遲

詩話京師顯靈宮在宮城之西長陵建以祀王  
靈官者也靈官藤像長陵每載之軍中有禱輒  
驗及金河州昇不可動宣德初拓其祠額曰大  
德顯靈宮復建東西二閣嘉靖三年營龍虎殿

以奉玄武馬閣中留題者衆以惟寅為壇場  
其云海上升仙人者相傳藤像獲之東海中也

呂時臣十首

時臣字中甫鄞縣人有甫東山人集

陳叔子云  
中甫詩頗

有高岑

遺調

詩話中甫以避仇客歷下與李中麓楊夢山切  
劇酬和既轉客青州衡莊王邸起高樓東向眺  
遠樓成王於望後四日置酒召客時日景既盡  
疎星尚微王未肅客坐憑闌語笑已而月上王  
歡甚因命曰待月樓請客賦詩中甫詩云川原  
夕氣交暝色自相向月猶藏海底人已坐樓上  
王賞擊謂得待字義手觴奉之俾居客右晚客  
藩宣王所客死河南中甫年六十治生擴於句



章之夕陽里自撰墓銘後十年乃卒歸櫬葬焉  
詩品在中麓夢山之間同時曳裾王門者多遜  
之

### 襄陽蹋銅鞮

青蒲沒漢水白馬度襄陽男兒但得意何處非故鄉

### 山中吟

桃源渺何許武陵萬仞山緬想秦時人生死桃花間  
邇來逾千載曾無幾人間桃樹推為薪桃源平作田  
雞犬入租稅焉可住神仙

交州古劍歌

古交州天陰日落鬼啾啾終宵白氣衝牛斗過客往往  
驚回頭主人知此有靈物呼兒掘得雙吳鉤螭蟬半蝕  
銅花綠淒淒霜鏹寒光流古來異物不易取令人得之  
反生憂放之唯恐蛟龍怒卷之猶畏神鬼愁亟令冶人  
復解鑄神器恐遭真宰怒不然仍貯空匣中恣爾含光  
在泥土

秋田為李生得衣字

明農兼課子田舍有書幃穠稭霜初下雞豚秋正肥西  
風菰米飯落日豆花扉已得遺安計無嫌老布衣

夜懷

起來喧不減策策動涼風月暗蟲聲裏人孤樹影中南  
埏寒尚早北地候難同想到鄞江上秋花滿舊叢

留別少府子魯

木落見中州遙連白帝愁黃河臨斷岸明月上孤舟作  
客已多歲還家又暮秋思君西下日寒葉滿江流

次李大參韻留別

河北中秋盡江南九月歸  
草深藏虎穴潮滿上漁磯  
田舍春新稻山妻補舊衣  
到家貧自得莫怪與君違

金山寺

萬古一卷石東南何壯哉  
半江截吳楚兩岸瞰樓臺  
僧飯蕪城乞人煙鐵甕來  
春深龍聽法風雨帶潮回

諸公邀登甘露寺留別

天風飄忽亭袍輕雨度  
登臨慰客情疎磬雨催山  
寺曉

亂帆春放海門晴江迴鐵甕三吳盡潮過金陵七澤平  
明日別離何處問斷腸煙樹漫蕪城

再經鍾吾懷許兵馬

去日黃河邊水深不可渡故人久不回今作行人路

鄭若庸

五首

若庸字中伯崑山人有蛭蜨集

李時遠云山人與茂秦齊名其

詩氣格

稍弱

詩話中伯曳裾王門妙擅樂府嘗填玉珎詞以  
訕院妓一時白門楊柳少年無繫馬者羣伎患

之乃醵金數百付薛生近充作繡襦記以雪之  
秦淮花月頓復舊觀承平勝事雖小堪傳今之  
秋鬼寒鷄想像昔年之  
酒旗歌扇良足艷也

秋涉

蒼山崔巍照秋渚紅樹離離夕陽渡行人涉水更看山  
馬足凌兢來復去雲際人家望欲迷松闌蘿徑隔煙扉  
山僧卧穩西巖寺時有鐘聲落翠微

王內輔三泉將命太嶽

神嶽蟠中極凌虛勢自孤星辰低絳闕雷雨護清都山

色遙連蜀江流直入吳金箱有靈秘到日佩真圖

衛水離歌

天涯何處客愁新濁酒初酣欲問津莫道三秋歸計晚  
尊前猶有未歸人

送張甘蘖刺史

衛水樓船曉向東青山南望一重重因君此別增鄉思  
目送春帆細雨中

丁小山赴浙東藩幕值余清泉賦別

清秋衛水汎樓船京國逢君已十年漫對綠尊悲白髮  
天涯去住一淒然

顧聖少

二首

聖少

一作

字季狂吳江人

留別謝茂秦

相對忽不樂愴然傷我心他鄉有同懷胡為遽分襟憶  
昔醉燕市擊筑誰知音意氣獨吾子排難輕千金重以  
易水歌魚之吳會吟論交豈不遠投分遂至今我亦慕



三閭南去湘之陰楚山一何長楚水一何深他日遙相思鹿門還可尋

送李汝學還上黨

傾蓋同為客攜尊復送君悲涼誰作賦南北此離羣坂沒羊腸雪山橫熊耳雲相思豈無鴈可待九秋聞

尤嘉  
一首

嘉字子嘉嘉興人有西陵集

詩話子嘉亦趙康王客稱敬甫錄其詩以比謝四溟句如偶因看竹來僧院不為求魚坐釣磯

頗有自適之趣康王賓客無多而  
吾里有二其一則仲舍人春龍也

送劉山人往太原謁梁李二使君

平原日落雁聲寒送子西游歲欲殘  
共惜異鄉裁別賦更於何處解征鞍  
山橫熊耳尖如削路遶羊腸曲似盤  
自是陳蕃能下榻匣中長鋏不須彈

徐渭 十三首

渭字文清更字文長山陰人有櫻桃館集

陶周望云

文長詩雜出於中晚宋元往往深於法而略於  
貌表中郎云文長詩有一段不可磨滅之氣

如嗔如笑如寡婦之夜哭窮人之寒起當其放  
意平時千里偶爾幽峭便是鬼語荒墳 陳臥  
子云文長亦有正音 李舒章云文長詩才粗  
黠雅人所少然其一往有雋處如部曲少將新  
跨紫

騶  
詩話文長詩原本長古間雜宋元流派所謂斐  
然成章不知所以裁之者其自評云吾書第一  
詩二文三畫四然詩文未免繁蕪  
不若畫品小塗大抹俱高古也

## 入燕

董生抱利器鬱鬱走燕趙賤子亦何能飄然來遠道行  
止本無常譬彼雲中鳥朝飲西園池暮宿北林杪感事

復懷人生年苦不早欲弔望諸君跡陳知者少垂首默  
無言春風秀芳草

柳元穀以所得晉太康間冢中杯及瓦券來易余  
手繪

遙思冢中人有杯不能飲孤此黃兔窰伴千三百稔券  
鏹四百萬買地作衾枕想當不死時用物必弘甚尊罍  
羅寶玉裹袂賤繡錦豈有纖纖指捧此鍛泥葦存亡隔  
一丘華寂迴千仞活鼠勝死王斯言豈不審

送蘭公子

阿翁學師也揚州人

耶溪芹藻色相伴秋荷老公子竭重來傷心那可道會  
日苦無多相別一何早八月廣陵濤一葉渡殘照

俠客

結客少年場意氣何揚揚燕尾芙蓉箭柳葉梨花槍為  
弔侯生墓騎驢入大梁

陰風吹火篇呈錢工部

陰風吹火火欲然老梟夜嘯白晝眠山頭月出狐狸去

竹徑歸來天未曙  
黑松密處秋螢雨  
煙裏聞聲辨鄉語  
有身無首知是誰  
寒風莫射刀傷處  
高旂影卧西陵渡  
幡底颯然人髮豎  
觸髅避月攪殘黍  
中流燈火青熒熒  
鰥魂未食陰風鳴  
莫言墮地永為厲  
宰官功德不可議

詩話此美錢工部能憫國殤召僧施食而作陰  
風吹火八句句句警策具體長吉而得其骨髓  
者也以下啾緩拖沓去嘔心人遠矣  
稍為變易存之結語尤索然無味

春日過宋諸陵

藁葬未須憐生時已播遷  
威儀非舊典世代是何年  
過

客悲山鳥王孫種墓田回看隴頭樹似接汴京煙

嚴先生祠

碧水映何深高蹤那可尋不知天子貴自是故人心山  
靄消春雪江風灑暮林如聞流水引誰識伯牙琴

懷陳將軍同甫

飛將遠從戎翩翩氣自雄椎牛千嶂外騎象百蠻中銅  
柱華封盡昆池漢鑿空雁飛真不到何處寄秋風

與客登招寶山觀海遂有擊楫岑港一窺賊壘之

興謹和開府胡公之韻奉呈

滄海遙連雉堞明  
登臨喜共幕賓清  
千山見日天猶夜  
萬國浮空水自平  
不分番夷營別島  
願圖方略至金城  
歸來正值傳飛捷  
露布催書倚馬纓

岳公祠

墓門朱戟碧湖中  
湖上桃花相映紅  
四海龍蛇寒食後  
六陵風雨大江東  
英雄幾日乾坤博  
忠孝傳家俎豆同  
腸斷兩宮終朔雪  
年年麥飯隔春風



宴遊爛柯山

二首

偏裨結束佩刀弓道上逢迎抹首紅  
夜雪不勞元帥入先擒賊將出洄中

羣兇萬隊一時平滄海無波漳嶺清  
帳下共推擒虎將江南只數義烏兵

夏相國白鷗園

白鷗池水拍天平相對瓊樓入太清  
試問歌臺生草處當時可許外人行

沈明臣 九首

明臣字嘉則鄞縣人有豐對樓集

莫廷韓云嘉則詩豪俊清

婉情至之語

足無古人

詩話嘉則文長同在胡少保宗憲幕府並受少保知遇督府周防嚴密文長恒戴敵烏巾衣白布襍衣非時闕入或出昵飲夜深猶聞戰戶以待嘉則嶽嶽不阿少保遙望見必起立嘗燕將士於爛柯山酒酣樂作嘉則於席上賦凱歌十章吟至狹巷短兵相接處殺人如草不聞聲少保起將其鬚曰何物沈郎雄快乃爾命刻石置山上及少保死請室中嘉則走哭墓下持所為誄通為訟寃比於文長懼禍發狂者相起矣嘉隆間士大夫以篇什相高最繁富者莫若弇州

於時吳明卿之戲甄洞汪伯玉之太玉李本寧  
之大泌山房諸集以及劉子威馮元成余仲房  
屠緯真之徒糟丘肉林愈多愈穢下及布衣如  
王承父王百穀輩咸以多相尚嘉則先後積詩  
七千餘夫安得精熟絮之承父則雖饒腐齒間  
有神芝即屬勢易不無嘉蕙非若諸君之叢菁  
荒茅紛然彌望也

### 大樹村劉氏少婦打虎行

潤州城南山簇簇四月麥黃桑柘綠大樹村頭劉氏居  
短牆幽院參差屋曉炊未罷日始高宰地猛虎來咆哮  
老小出門盡驚走犬亦吠虎聲嗥嗥虎聞犬聲急轉步

一口斃之如搏兔欲從虎口奪狗還老嫗抱孫逢虎怒  
劉家少婦奪老姑氣猛視虎如匹鷄手持銅叉刺虎目  
虎血濺面紅糝糊昨從大樹村前走少婦滌場猶髻首  
弱體孱然花不如徐家女子劉松婦

抗首

抗首望西秦朝廷急用人玉關疎控扼紫塞滿荆榛痛

昔籌邊賦

錦衣衛經歷沈鍊所上有賦

憐君侍從臣誰為謝安石談

笑淨風塵

送箕仲之衢州

古路三衢外青山太末餘樵迷仙子質廟過偃王徐楚  
橘秋全熟吳楓江漸疎舊遊題石處好為一躊躇

顧晉卿席上聞其弟益卿憲副南越之捷喜而賦  
之

廿年豺虎劇縱橫百粵遙傳一日平再睹樓船橫海出  
更標銅柱伏波名天青馬嶂春銷甲雨過龍川夜洗兵  
誰道虎頭非將種請纓原只是書生

浣紗石

不見浣紗人空留浣紗石石邊春草痕想見羅裙色

凱歌

銜枚夜度五千兵密領軍符號令明狹巷短兵相接處  
殺人如草不聞聲

蘭皋竹枝

東村西村姑惡啼家家麥熟黃雲齊春蠶作繭桑園綠  
睡起日斜聞竹雞

過崑山

桃花楊柳共西灣  
曾唱菱歌帶月還  
春色茫茫今莫問  
滿城煙雨過崑山

無題

夢裏相逢恐未真  
世間何物不傷春  
馬蹄明日天涯路  
誰是燈前昨夜人

王

寅

二首

寅字仲房一字亮卿歙縣人有十岳山人集

禹注

人云亮卿

詞意超逸

詩話仲房少走大梁問詩於歐吉不過遂從少林僧習兵杖海上用兵依胡尚書督府尚書不能用意以歌晚蠲鄉人之詩曰新都秀運集其持論頗偏與岳東伯今兩瑤華相類

## 吳山秋晚

有客閒居無奈閒為看秋色一躋攀百盤細草斜陽路  
三曲澄江隔岸山野寺最宜紅葉後孤鐘偏在白雲間  
賞心又得逢僧話此後幽期數往還

答金在衡訊歸



秣陵宮樹葉初飛  
客路何人為授衣  
我亦驚秋同海燕  
故鄉端在社前歸

康從理

四首

從理字裕卿永嘉人有二雁山人集

胡元瑞云裕卿近體

閨麗翩翩  
布衣之雄

詩話裕卿任俠談兵間闖戎幕劉將軍子高建  
肅毘陵病革裕卿馳赴與訣經紀其喪扶其柩  
至武陵遠近皆義之居燕偕黎惟敬輩游西山  
其倡和詩僅存餘多散佚太倉曹子念收而刻  
之

再至京口有懷金焦舊游

層城舒遠目迢遞送歸鴻歲月更新歷江山憶舊蹤鐘聲春浪靜燈影暮流空媿有東林約無因問遠公

同王必漸言懷

江頭木落鴈初飛客子傷心賦授衣鄉夢不緣千里隔浪遊空說半生非雲山是處堪招隱塵海何年可息機漫向天涯愁極目幽懷已負北山薇

懷顧太學

登樓風雨暮蕭蕭久客離魂暗欲消  
楚樹吳雲春寂寞  
塞鴻江燕歲迢迢新愁芳草天涯路  
舊事梅花月下簫  
今日分飛悲萬里憑闌搔首思無聊

送陳京兆致政還白下

挂冠東去共稱賢天外浮雲意渺然  
不是逢萌因世難  
祇緣弘景嗜神仙琴中白雪驚人調  
江上青山負郭田  
無限長干花柳色春風不乏杖頭錢

郭造卿一首

造卿字建初福清人諸生為少保戚繼光幕客

有海嶽山房存稿

葉進卿云建初詩詣體無不工

寇退鄉人回口占代書

城南烽火近何如留滯無從訊起居百里便同千里隔  
家書翻比捷書疎清秋涕淚唯懷土白髮庭闈正倚閭  
欲寫愁心愁不盡憑君傳語到吾廬

王

翹

三首

翹字叔楚蘇州嘉定人嘉靖中倭亂嘗居幕府

贊軍事有小竹集

詩話叔楚工畫竹予嘗觀其真蹟為賦長歌不知其幕府才雄也邑人侯大年述其繪草蟲更精惜未得見小竹集一冊中間贈酬諸將之作居多

賞火謠

并序

吳城六門莫盛於西閭六月初賊舉火焚楓橋達晝夜時宰坐睥睨間飲酒顧望無異平日時烈風大作煙焰蔽天不辨咫尺哭聲遍城內外或指城上云勿啼哭看城上賞火吁有是哉作

賞火謠

金閨門外賦火赤萬室齊燒纔頃刻城頭坐擁肉食人  
對火銜杯如賞春城中哭聲接城外宰獨何心翻痛快  
憤兵獨有任公子夜半巡城淚不止縋城躍馬出沙河  
義師都向湖心死

客夜

山月漸高低燭光有客逗遛衣滿霜淒淒獨夜還自語  
茫茫一水遙相望黃花勸酒酒不醉白石放歌歌轉長

弧矢天涯男子事錯將歧路卜行藏

秋懷

碧天大火未全收一雨空庭帶葉流不為無家悲落莫  
他鄉燕子早知秋

明詩綜卷五十四



總校官庶吉士

臣張能照

校對官庶吉士

臣嚴福

膳錄監生

臣陸學稼